

+ Centro di Memoria



Alzheimer



Kiko ta e malesa di Alzheimer?

E malesa di Alzheimer ta un malesa di cerebro cu ta incurabel y den cual celnan den diferente parti di e cerebro ta stop di funciona y a degenera. E malesa di Alzheimer ta progresivo. Esaki kiermen cu e persona lo keda bay atras. Ainda e causa exacto y un tratamiento completo no ta conoci. Door di e daño progresivo den e cerebro cada biaha por experiencia mas problema den e funcion di e diferente organonan. Hopi biaha esaki ta cuminsa cu problema leve di memoria. E persona ta bira menos activo y por ripara cu e ta reacciona menos liher.

E dificultadnanaki ta hopi parecido cu e dificultadnancu por experienciadoor di biehes normal. Un diferencia grandi ta cu e problemanan relaciona cu un demencia ta progresivo, ta aumenta den intensidad y ta stroba e bida diario. Nos por mira e diferencia riba e figura di un cerebro di un persona cu Alzheimer compara cu e cerebro di un personasaludabel. Den realidad ta asina cu e volumen di e cerebro, cuminsando na e parti mas ariba cu yama Cortex, ta bira menos. Esaki ta sosode cu tempo.

Diferente fase di Alzheimer

Fase trempan di Alzheimer.

Den e fase trempan no ta mira hopi cambio den e comportacion of e abilidadnan di e persona. Loke ta mas riparabel ta cu e persona tin dificultad pa corda eventonan recien.

Un hende den fase trempan:

- Ta lubida eventonan of combersacionnan reciente.
- Ta ripiti su mes.
- Ta mas slow pa compronde cosnan nobo.
- Ta perde durante un combersacion of ora e kier conta algo e ta lubida.
- Ta confundi.
- Ta papia cu mas dificultad.
- Tin dificultad pa tuma decisionnan.
- Tin menos interes den otro hende of actividadnan.

Fase intermedio di Alzheimer

Den e fase intermedio e cambionan ta bira mas obvio. E persona tin mester di mas ayudo ora di come, baña y bisti. E ta cuminsa lubida mas, ta ripiti e mesun storia varios biaha.

Un hende den fase intermedio:

- Ta confundi den unda e ta of ki dia e ta.
- Ta rabia mas liher, por bira agresivo of tin desconfiansa.
- Kier cana bay for di cas of ta perde e caminda pa cas.
- Ta lanta cana durante anochi sin cu e kier drumi.
- Ta hinca su mes of otro den peliger door di lubida (laga stoof/gas cendi).
- Ta actua di manera straño (p.e. cana pafor cu yapon bisti).
- Ta wak of scucha cosnan cu otro hende no ta mira of scucha.

Fase final di Alzheimer

Den e fase aki e persona mester di ayudo tur ora. E problema di memoria ta bira hopi mas grandi: e persona cu Alzheimer no por corda hende, lugar, of obhetto conoci.

Un hende den fase final:

- Tin problema pa kauw y guli.
- Ta baha hopi di peso, aunke cu e ta come hopi.
- Ta bira incontinente (mester di pampier pa haci su necesidadnan).
- Ta lubida con e tin cu papia, aunke e por ripiti cierto palabranan of por grita tin biaha.
- Ta bira hopi agita y constant ta rondia algo of un hende.
- E ta bira tristo.
- Ora di baña/bisti e por rabia, mayoria di biaha e no ta compronde kico ta pasando.

Pa esnan cu ta sufri di Alzheimer e ta un momento duro pa realisa cu esaki ta algo fuera di nan control. E ta tuma tempo pa esnan rond di e persona cu ta sufri di Alzheimer realisa y acepta e debilidadnan cu Alzheimer ta trece cune.

Den tur circunstancia ta miho pa enfoka riba emocion y experiencianan positivo.

Den colaboracion cu:**Centro di Memoria Aruba**

San Pedro Paviljoen
Caya Ing. Lacle #5
Oranjestad, Aruba

Tel.: (297) 597-4342

Fax: (297) 583-7766

E-mail: cdm@arubahospital.com